



Achimelech donne les pains de proposition à Daudid ; dont Saül estant aduert, fait occire le grand Prestre.

PRES que Daudid & Ionathas eurent fait paction d'amitié ensemble, chacun d'eux se partit, & Daudid se retira en Nobé vers Achimelech grand Prestre, auquel il demanda du pain, pour subuenir à la faim qui le pressoit. A quoy Achimelech obtemperant, à faute de pain commun, luy bailla les pains de proposition, & l'espée de Goliath. Or estoit en ce lieu vn des seruiteurs de Saül, nommé Doëg Iduméen, qui vid Daudid prendre les pains de proposition, & le glaive de Goliath, qu'Achimelech luy bailla pour fuir arriere de Saül vers Achis Roy de Geth. Les seruiteurs duquel dirent ; N'est-ce pas icy ce Daudid Roy de la terre ? Ne chantoit-on pas deuant luy en dansant, disant ; Saül a frappé mille, & Daudid dix mille Philistins ? lors que Goliath fut occis en la vallée de Terebinthe. Or Daudid voyant estre connu, eut grande frayeur en son cœur, & craignant Achis Roy de Geth, il changea sa contenance, feignant estre fol, parquoy on le laissa aller, & s'enfuit en la cauerne d'Odollam, où ses parents & autres vinrent vers luy ; mais il se retira vers le Roy en Maspha. Or Saül fut aduert par Doëg, des biens faits qu'Achimelech auoit faits à Daudid, parquoy le manda venir à luy, & le fit tuer avec ses Prestres, hor-mis Abiathar qui se sauua vers Daudid, qui luy promit à l'aduenir toute assistance & amitié.